

16. oktober 2025

UKA2025/110

Nuna tamakkerlugu illuutinik ilusilersuisarnermut, illuliortaatsinut, politikimik ineriartortitsinissamut suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Erik Jensen, Siumut)

Siullermik Siumut sinnerlugu Naalakkersuisut siunnersuummut akuersaartumik akissuteqarneranut qujassuteqarfigiumavakka. Nuannerpoq takullugu apeqqummut isumaqatigiittoqarniarloq, tassami illunik assigisaanillu ulluinnarni isigisatsinnik ilusilersuineq taamaallaat taakkununga tunnganani - aamma inuiaqatigiittut ersersitsinitsinnut, kulturitsinnut, inooriaasitsinnut aamma inuiaqatigiit ineriartornerannut tunngasut pivagut.

Avatangiisitsinnik ilusilersuineq inuunitsinni ullut tamaasa atugaraarput. Tamanna oqaluttuarpoq kinaanitsinnik, aamma inuiaqatigiittut siunissamut qanoq periarfissinniarnitsinnut. Illunik avatangiisinillu ilusilersuineq taamaallaat teknikimut tunnganngilaq, kisianni aamma periarfissaq ataatsimoortumik takorluukkat qanoq ittuunissaanik pilersitsiniarneruvoq. Siunnersuummi tunngavigineqarpoq, ilusilersuineq tassaassasoq eqqarsaatigeqqissaakkanik tunngaveqartoq – oqaluttuarisaanitsinnik ataqqinnittumik, avatangiisitsinnik mianerinnittumik aamma najugaqarfiit immikkoorutaat tamarmik innimigineqassasut.

Siumut kissaatigaa, politikip tamassuma innuttaasunut tamarmiusunut tunngatinneqassasoq. Sulineq ingerlanneqassaaq ilusilersuisartut, kommunit, kulturilerisut, inuussutissarsiortut innuttaasullu suleqatigalugit. Piumasaqaataassaaq avatangiisit kusanartut, atasinnaasut inuiaqatigiittullu ilisarnaativut tunngavigineqarnerulissasut. Tamanna isumaqarpoq illoqarfinni nunaqarfinnilu tamarmik pitsaassutsimik sanaartornermi periarfissaqarlutillu suleqataaffeqartariaqartut, aamma sumiiffinni atortussatigut periarfissat atorluarneqassasut, ileqqutsinnut nunattalu sananeqaataanut tulluarsarneqarsimasut.

Naalakkersuisut akissuteqaatiminni tikkuarpaat periusissiornermik suliaqarneq aallartikkusullugu. Tamanna Siumup isumatusaarnertut isigaa. Taamaakkaluartoq erseqqissassavarput, oqariartuut tamanna sulinermik, iliuseqarnermik politikikkullu sammivilersuineramik aamma imaqaassamat. Tassami Siumumiit kissaatiginneqaarput pilersaarusiunnarsimalluta inissasugut,



pujorallertussamillu suliaqassasugut. Suliniutit piviusunngortinniarlugit tamatta suleqataasaagut, aamma inuiaqatigiitsinni tamanna tamatta malunnartinniassallugu suliaqartugut Siumut isumaqarpoq.

Suliaq ilarujussua ullumikkut sanaartornermi teknikikkut sinaakkusiussat nalilersoqqinnissaanut tunngassaaq. Tamakku ilarujussi suli danskit periusersaanik aallaaveqarput. Pisariaqartipparput kalaallit periusersaanut nuussasugut, avatangiiserput tarrarsorneqassasoq, aningaasaqarnerput akigitinneqartullu eqqarsaartigineqassasut aamma uagut apeqqummut naammassisaqarnerunissarput pimoortissagipput. Pisariaqartipparput nammineq piumasarput aallaavigalugu suliaqpassuarnut periarfissaqarnerulernissaq.

Suliaq una suliffissanik pilersitsisinnaavoq, takornariartitsineq nukittorsaatigalugu ingerlatsisoqarsinnaavoq, avatangiisitsinnut naleqqussarnerusoqarsinnaavoq, inuussutissarsiortut periarfissaqarnerulersinneqarsinnaapput aamma inuunitsinni atukkavut pitsaanerulersissinnaavagut. Qanorluunniilli inuit pineqarput – toqqissisimanartitaminnik, kusanartunik aamma atoruminartunik avatangiiseqarnissaat.

Siumut piareersimavoq suleqataanissamut – aamma piareersimavugut qulakkeerniassallugu, takorluukkat piviusunngortinnissaanut.

Taamak oqaaseqarluta suliaq Sanaartornermut Ataatsimiititaliamut ingerlateqqinneqarnissaa innersuussutigaarput.

Siumup naatsorsuutigaa, suliap qaqugu naammassineqarnissaa ataatsimiititaliami eqqartorneqarumaartoq. Siumut isumaqarpoq piviusorsiortoq, periusissiassaq 2027-mi upernaakkut ataatsimiinnermi saqqummiunneqarsinnaapput.

Anders Olsen

Siumut